

改為當傳曰此議甚當依此施行○憲府啓曰李元祐等雖曰降品付祿其實則收叙也揆之情法輕重有異縱至屢改庸何傷乎而況其中被顯駁見罷未久者亦多有之何必汲汲付祿輕毀罷職之法乎請勿叙太僕掌輿馬廐牧其任至重而一寺之中長官尤重故例以有名望經侍從之人差授者所以彈壓下僚糾察官事之意也正黃悅性本輕妄加以不謹京外居官到處泛濫不容於公論久矣及為本職尚不知戒以司中廝養之物為一已濟欲之資頻數設辦下人怨苦隨意私用寺儲耗竭至於廐馬瘦瘠僵斃相繼未有甚於此時而其他貽弊多端之狀不可一一形言且近有輕侮玉堂大傷事體之事其為顛倒亦可知矣物論激發不可一日在職請罷荅曰李元祐等事既議大臣定之不可紛改故不允黃悅事如啓後元祐等事累啓依允

○日暈

壬子夜東方巽方南方如火氣

癸丑上御夕講